

Wulf Wagers wunderliche Weltbetrachtung

Gaulsparade mit G'schmack

Letscht Woch' war mol wieder en der Hanns-Martin-Schleyer-Halle en Stuegert. Do war so a Pferdeshow, dia au wirklich guad war. Soviel vornaweg.

Scho alloi dia A'reis auf da Cannstatter Wasa war a Kataschdrof. Weil dr VFB gspielt hot, warat nadierlich en Haufa Leit ondrwegs. Aber d' Bolizei hot no au no künschtlich en Stau proviziert, weil se so a Fußballfanauto kontrolliert hend ond damit a ganze Spur dicht war. Do han i scho a ganze halbe Stond verlorra ond war ohnehin scho knapp dra. Meine Mädla hend dringend pinkla miassa. Wo mr endlich en dr Halle warat, send vor dem Frauaklo zwanzig Meter lange zwoispurige Schlanga gstanda. Au vor em Männerklo war a lange Frauaschlange. Manche



Männer, die vor dr Show nomol gschwend a Wässerle abschlaga hend wella, hend poschtwendend omkehrt, wo se dia Frauabatlione gsäh hend. Hengstparade mit Ladehemmung.

I han für die Show die bescht Kategorie an Karta kauft. Ond wo mir onsere Plätz ei'gnomma hend, warat mir au total z'frieda, weil mir a super Sicht auf die Arena ghet hend, denn vor uns warat – welch Wunder – zwoi Plätz frei.

No isch 's Licht ausganga ond die Show hot agfanga. Femf Minuta später isch a Pärle komma, wo er mindeschtens so groß ond broit wie dr Vitali Klitschko gwäa ischt. Damit war für mi die Show glaufa, weil i praktisch ibrhaupt mix meh gsäh an.

Irgendwann hot's agfanga mächtig noch Gäul zom riecha. Des hot den Klitschkoverschnitt offensichtlich animiert a paar saftige windförmige Verdauungsergebnisse en sein Sitz zu drucka. Des Aufnahmevermöga von dem Polschter war aber net wirklich ausreichend ond so hend mir des alles abkriegt. Des hot mr no glangt ond i ben verduftet ...

Bis näggschd Woch'.

Ihr

Wulf Wager